



Sumáriu Kazu 2015
Tribunál Distritál Suai
Fevereiru 2015

**Sumáriu prosesu julgamentu kazu iha Tribunál Distritál Suai - Períodu
Fevereiru 2015**

Introdusaun

Iha Fevereiru 2015, JSMP kontinua hala'o atividade monitorizaun iha Tribunál Distritál Suai (TDS). Durante períodu ne'e, JSMP monitoriza kazu 35 hosi total kazu 47 ne'ebé TDS julga. Kazu hirak ne'e inklui kazu sira ne'ebé julga atraves hosi tribunál movel iha Distritu Bobonaro.

Kazu hirak ne'e involve krime sira hanesan ofensa ba integridade fízika simples ho natureza violénsia doméstika 4, ofensa ba integridade fízika simples 11, omisídiu simples 2, violasaun seksuál agravadu no interupsaun ba grávidez 1, kondusaun sem karta 2, abuza seksuál ba menor 2, ofensa ba integridade fízika grave 1, aktu seksuál ba adolexente 1, danu agravadu 2, abuza poder 1, violasaun seksuál agravadu 1, ameasa 1, tentativa violásaun seksuál agravadu 1, danu simples 1, pasajen moeda falsa 1 no violasaun seksuál 1. Entretantu kazu 2 mak involve kazu sivíl kona-ba obrigasaun poder paternal.

Hosi kazu 35 ne'ebé JSMP observa, kazu 22 mak tribunál konklui ona nia prosesu no kazu 13 sei iha prosesu nia laran.

Tuir mai deskrisaun sumariu julgamentu kazu kompletu:

**1. Kazu krime ofensa ba integridade ba fízika simples ho natureza violénsia doméstika -
Nú. Prosesu : 27/pen/2014/TDS**

Kompozisaun Tribunál : Singulár
Juis : Dr. Costancio Barros Bâsmery
Ministériu Públiku : Dr. Jose Elo
Defeza : Dr. Joanico da Costa (pesoa idonia)
Konkluzau : Kondena ho pena multa

Iha 10 Fevereiru 2015, Tribunál Distritál Suai hala'o prosesu julgamentu no kontinua kedas ho leitura sentensa ba kazu ofensa ba integridade fízika simples ne'ebé involve arguidu AF hasoru nia feen (GdLF). Kazu ne'e akontese iha 03 Abril 2013, iha Distritu Suai.

Ministériu Públiku akuza katak iha 03 Abril 2013, arguidu tebe dala ida iha lezada nia kidan no basa dala ida iha lezada nia hasan parte loos. Aktus ne'e rezulta lezada sofre moras iha kidan no bubu iha lezada nia hasan. Kazu ne'e akontese tanba lezada lori nia alin nia telefone ba karega iha sede suku no la fo hatene ba arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu arguidu konfesa totalmente ba faktus sira iha akuzasaun ministériu públiku. Aleinde ne'e, lezada mós kontinua mantein ho faktu sira ne'e.

Iha alegasaun finál, ministériu públiku husu ba tribunál atu aplika pena prizaun fulan 1 suspende ba tinan 1. Enkuantu, defeza husu ba tribunál atu aplika pena ne'ebé kmaan ba arguidu tanba arguidu no lezada di'ak malu nomós nunca mosu problema tan to'o agora.

Tribunál konklui prosesu ne'e no kondena arguidu ho pena multa US\$60,00 ne'ebé sei selu US\$1,00 kada loron durante fulan 2. Tribunál mós kondena arguidu ho pena alternativu durante fulan 1 loron 10 iha prizaun kuandu arguidu la selu pena multa refere.

2. Kazu krime ofensa ba integridade ba fízika simples ho natureza violénsia doméstika - Nú. Prosesu : 233/pen/2014/TDS

Kompozisaun Tribunál	: Singulár
Juis	: Dr. Alvaro Maria Freitas
Ministériu Públiku	: Dr. Mateus Nessi
Defeza	: Dr. Vasco Kehi (pesoa idonia)
Konkluzau	: Kondena ho pena prizaun fulan 2 suspende ba tinan 1

Iha 10 Fevereiru 2015, Tribunál Distritál Suai hala'o prosesu julgamentu no prezide leitura sentensa ba kazu krime krime ofensa ba integridade fízika simples ne'ebé involve arguidu EC hasoru nia feen (AIT). Kazu ne'e akontese iha 20 Setembru 2013, iha Distritu Suai.

Ministériu Públiku akuza katak iha 20 Setembru 2013, arguidu basa dala ida iha lezada nia hasan parte loos no tuku dala ida iha lezada nia kabas. Aktu ne'e rezulta lezada sofre moras iha kabas no bubu iha hasan parte loos.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu arguidu konfesa totalmente faktu sira hosi akuzasaun ministériu públiku. Aliende ne'e, lezada mós kontinua konfirma ho faktu sira ne'e.

Tanba arguidu konfesa faktu hirak iha akuzasaun, nune'e iha alegasaun finál, ministériu públiku husu ba tribunál atu aplika suspensaun ba pena prizaun ba arguidu. Enkuantu, defeza husu ba tribunál atu aplika pena ne'ebé kmaan ba arguidu tanba arguidu no lezada di'ak malu ona no nunka mosu problema to'o agora.

Depois avalia faktu no prosesu sira relasiona ho kazu ne'e tribunál konklui prosesu ne'e kondena arguidu ho pena prizaun fulan 2 suspende ba tinan 1.

3. Kazu krime ofensa ba integridade fízika simples - Nú. Prosesu : 119/pen/2014/TDS

Kompozisaun Tribunál	: Singulár
Juis	: Dr. Costâncio B. Bâsmery
Ministériu Públiku	: Dr. Mateus Nesi
Defeza	: Dr. Vasco Kehi (pesoa idonia)
Konkluzau	: Kondena ho pena prizaun tinan 1 suspende ba tinan 2

Iha 10 Feveireiru 2015, Tribunál Distritál Suai hala'o prosesu julgamentu ba kazu krime ofensa ba integridade fízika simples ne'ebe involve arguida VM hasoru nia laen (FM). Kazu ne'e akontese iha 10 Feveireiru 2014, iha Fohorem, Distritu Suai.

Ministériu Públiku akuza katak iha 10 Feveireiru 2014, lezadu ba sori feto nian rua ne'ebé diskuti malu hela kona-ba rai. Wainhira lezadu tama klaran hodi sori feto na'in rua ne'e, arguida la konkorda no foti fatuk tuda tuda iha lezadu nia liman karuk. Aktu ne'e rezulta lezadu sofre liman metan no bubu.

Ministériu Públiku akuza arguida kontra artigu 145 Kódigu Penál kona-ba ofensa ba integridade fízika simples.

Iha prosesu julgamentu arguida konfesa no rekoñese ninia hahalok tuir faktu sira ne'ebé ministériu públiku akuza hasoru nia. Nune'e mós lezadu konfirma katak nia hetan tuda duni hanesan haktuir iha akuzasaun ministériu públiku nian.

Iha alegasaun finál, ministériu públiku husu ba tribunál atu aplika pena multa ba arguida no defeza husu ba tribunál atu aplika pena ne'ebé justu no adekuada ba arguida tanba arguida konfesa ba faktu sira no rekoñese nia-salan.

Depois rona tiha alegasaun finál hosi parte rua, tribunál konklui kedas kazu ne'e no kondena arguida ho pena prizaun tinan 1 suspende ba tinan 2.

4. Kazu krime ofensa ba integridade ba física simples ho natureza violénsia doméstika - Nú. Prosesu : 263/pen/2014/TDS

Kompozisaun Tribunál : Singulár
Juis : Dr. Costâncio Barros Bâsmery
Ministériu Públiku : Dr. Mateus Nessi
Defeza : Dr. Vasco Kehi (pesoa idonia)
Konkluzau : Kondena ho pena multa US\$180,00

Iha 10 Feveireu 2015, Tribunál Distritál Suai prezide julgamentu leitura sentesa ba kazu krime ofensa ba integridade física simples ne'ebé involve arguidu FMG hasoru feen (DC), iha 20 Jullu 2014, iha Distritu Suai.

Tribunál konsidera katak arguidu provadu komete krime ne'ebé haktuir iha akuzasaun ministériu públiku nian. Tanba ne'e tribunál konklui prosesu u ne'e no kondena arguidu ho pena multa US\$180,00 ne'ebé kada lora sei selu US\$1,50 durante lora 120. Tribunál mós kondena arguidu ho pena alternativu durante lora 40 prizaun kuandu arguidu la selu pena multa refere.

Antes ne'e, ministériu públiku akuza katak iha 20 Jullu 2014, arguidu tuku dala ida iha lezada nia hasan parte loos, tuku dala ida iha lezada nia ulun no tebe dala ida iha kidan. Aktu ne'e rezulta lezada sofre moras iha kidan no bubu iha hasan no ulun. Kazu ne'e akontese tanba lezada dehan arguidu buan manas. Tanba ne'e arguidu nervozu no komete krime ne'e hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alineaia (b) Lei Kontra Violénsia Doméstika.

Iha prosesu julgamentu arguidu konfesa totalmente faktu sira hosi akuzasaun ministériu públiku. Nune'e mós lezada konfirma faktu sira ne'e no deklarara katak nia hetan baku duni hanesan haktuir iha akuzasaun ministériu públiku.

5. Kazu krime omisídiu simples - Nú. Prosesu : 218/pen/2014/TDS¹

Kompozisaun Tribunál : Koletivu
Juis : Dr. Constancio B. Bâsmery, Dr. Argentino Luisa Nunes
no Dr. Euzebio Xavier Vitor (estajiáriu)

¹ Prosesu julgamentu kazu ne'e, bele asesu iha website jsmp : www.jsmp.tl iha parte publikasaun sumariu kazu fulan Janeiro 2015 hosi Tribunál Distritál Suai.

Ministériu Públiku : Dr. Jose Elo
Defez : Dr. João H. de Carvalho
Konkluzau : Kondena ho pena prizaun tinan 12

Iha 11 Fevereiru 2015, Tribunál Distritál Suai prezide julgamentu leitura akordaun no kondena arguidu Rafael de Carvalho ho pena prizaun tinan 12 tanba provadu komete krime omisídiu simples hasoru matebian Guilhermino Barreto. Kazu ne'e akontese iha 11 Maiu 2014, iha Zumalai, Distritu Suai.

Tribunál prova katak katak arguidu mak oho duni lezadu no tanba ne'e tribunál konklui hodi kondena arguidu ho pena tinan 12.

Iha prosesu julgamentu antes, ministériu públiku katak iha 11 Maiu 2014, lezadu ho nia feen no oan nain rua fila hosi Walgomon atu ba Maukola, Suku Beko. Iha dalan klaran sira hasoru malu ho arguidu. Iha momentu ne'ebá lezadu haruka nia feen no oan nain rua la'o uluk no derepentu arguidu tuku no tebe dala barak iha lezadu nia isin lolon to'o lezadu mate iha fatin akontesimentu. Kazu ne'e akontese sein motivu ne'ebé klaru, inklui lezadu nia feen rasik mós la hatene tanbasa arguidu sira asalta no oho nia laen.

Ministériu Públiku akuza arguidu kontra artigu 138 Kódigu Penál kona-ba omisídiu simples ne'ebe nia moldura penal hosi tinan 8 to'o tinan 20 prizaun.

6. Kazu krime violasaun seksuál agravadu no interrupsaun ba gravidéz - Nú. Prosesu : 48/pen/2014/TDS²

Kompozisaun Tribunál : Koletivu
Juis : Dr. Alvaro Maria Freitas, Dr. Argentino Luisa Nunes no
Dr. Costãncio Barros Bâsmery
Ministériu Públiku : Dr. Jose Elo
Defeza : Dr. João H. de Carvalho
Konkluzau : Kondena pena prizaun 15 no selu indemnizasaun ba
lezada US\$1500,00

Iha 11 Fevereiru 2015, Tribunál Distritál Suai prezide leitura sentensa ba kazu ne'ebé Tribunál Rekursu haruka fila fali ba Tribunál Distritál Suai atu halo rejulgamentu.

Depois halo rejulgamentu ba kazu ne'e tribunál kontinua kondena arguidu ho pena prizaun tinan 15 no selu indemnizasaun hamutuk US\$1500,00 ba lezada ne'ebé nu'udar nia oan hakiak hanesan desizaun antes. Kazu ne'e akontese iha 20 Abril 2013, iha Distritu Ainaro.

² Prosesu julgamentu kazu ne'e, bele asesu iha website jsmp : www.jsmp.tl iha parte publikasaun sumariu kazu fulan Janeiro 2015 hosi Tribunál Distritál Suai.

Iha prosesu julgamentu antes, ministériu públiku akuza katak iha 20 Abril 2013, arguidu ameasa lezada ho katana no obriga lezada halo relasaun seksuál ho arguidu.

Ministériu Públiku akuza arguidu kontra artigu 172 Kódigu Penál kona-ba violasaun no artigu 173 Kódigu Penál kona-ba agravaun konjugadu ho artigu 141 Kódigu Penál kona-ba interrompsaun ba gravidéz.

7. Kazu krime ofensa ba integridade ba física simples ho natureza violénsia doméstika - Nú. Prosesu : 203/pen/2014/TDS

Kompozisaun Tribunál : Singulár
Juis : Dr. Costáncio Barros Bâsmery
Ministériu Públiku : Dr. Jose Elo
Defeza : Dr. Joanico da Costa
Konkluzau : Kondena ho pena multa US\$180,00 no selu kustu judisiál US\$20,00

Iha 11 Feveireiru 2015, Tribunál Distritál Suai, prezide julgamentu leitura sentensa ba kazu ofensa ba integridade física simples ne'ebé involve arguidu PX hasoru feen (EdA). Kazu ne'e akontese iha 11 Marsu 2014, iha Distritu Ainaro.

Tribunál konsidera katak faktus hotu-hotu ne'ebé mai hosi akuzasaun ministériu públiku provadu. Tanba ne'e tribunál konklui prosesu ne'e no kondena arguidu ho pena multa US\$180,00. Tribunál mós kondena pena alternativa durante loraun 60 prizaun kuandu arguidu la selu pena multa refere. Eleinde pena multa ne'e, tribunál mós kondena arguidu selu kustu judisiál US\$20,00.

Antes ne'e, ministériu públiku akuza katak iha 11 Marsu 2014, arguidu lori ai-dona ida baku dala rua iha lezada nia ai-kabun loos no baku dala ida iha lezada nia liman sikun parte loos. Aktu ne'e rezulta lezada sofre moras iha ain kabun no sofre bubu iha nia liman sikun. Kazu ne'e akontese tanba sira diskuti malu kona-ba osan ne'ebé arguidu simu la fo ba lezada no arguidu nervozu hodi baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alinea (b) Lei Kontra Violénsia Doméstika.

Durante julgamentu arguidu konfesa ninia hahalok no lezada mós kontinua reforsa faktu sira iha akuzasaun ministériu públiku nian. Tanba ne'e iha alegasaun finál, ministériu Públiku husu ba tribunál atu aplika pena prizaun tinan 1 suspende ba tinan 2 ba arguidu.

Entretantu, defeza husu ba tribunál atu aplika pena ne'ebé kmaan ba arguidu tanba arguidu no lezada di'ak malu ona nu'udar feen no laen nomos nunca mosu problema to'o agora.

8. Kazu krime ofensa ba integridade fízika simples - Nú. Prosesu : 217/pen/2014/TDS

Kompozisaun Tribunál : Singulár
Juis : Dr. Costancio Barros Bâsmery
Ministériu Públiku : Dr. Mateus Nesi
Defeza : Dr. Vasco Kehi (pesoa idonia)
Konkluzau : Omologa

Iha 11 Fevereiru 2014, Tribunál Distritál Suai prezide julgamentu tentativa konsiliaun ba kazu krime ofensa ba integridade fízika simples ne'ebé involve arguidu Domingos Camões hasoru Antalita Tilman de Araujo nu'udar arguidu nia viziñu. Kazu ne'e akontese iha 26 Janeiru 2014, iha Ramelau, Distritu Ainaro.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Atraves hosi tentativa konsiliaun ne'e, arguidu rekoñese nia sala no husu diskulpa ba lezada no promete katak nia sei la repeta tan krime ne'e iha futuro. Lezada mós fo perdua ba arguidu no deside dada fila fali kazu ne'e.

Bazeia ba pedidu dezistensia ne'e, tribunál omologa prosesu ne'e no absolve arguidu hosi akuzasaun ministériu públiku.

9. Kazu krime ofensa ba integridade fízika simples - Nú. Prosesu : 223/pen/2014/TDS

Kompozisaun Tribunál : Singulár
Juis : Dr. Costãncio B. Bâsmery
Ministériu Públiku : Dr. Mateus Nesi
Defeza : Dr. Vasco Kehi (pesoa idonia)
Konkluzau : Kondena ho pena prizaun tinan 1 suspende ba tinan 2

Iha 11 Fevereiru 2014, Tribunál Distritál Suai hala'o prosesu julgamentu ba kazu ofensa integridade fízika simples ne'ebe involve arguidu Julio de Carvalho hasoru Mariana de Jesus nu'udar nia viziñu. Kazu ne'e, akontese iha 05 Maiu 2014, iha Zumalai, Distritu Suai.

Ministériu Públiku akuza katak iha 05 Maiu 2014, arguidu lori fatuk ida tuku dala iha lezada nia reen-toos, tuku dala ida iha tilun hun no tuku dala ida iha liman sikun parte karuk.

Aktu ne'e rezulta lezada sofre kanek no bubu iha reen-toos, tilun no bubu iha liman sikun parte loos no lezada tenke halo tratamentu iha ospitál durante loron ida. Kazu ne'e akontese tanba lezada haruka arguidu nia inan hamos bee dalan ne'ebé liuhosi lezada nia uma oin. Tanba ne'e

sira diskuti malu no arguidu rona lezada diskuti malu no arguidu ninia inan nune'e arguidu la kontente no ba baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples.

Iha prosesu julgamentu arguidu nega ba faktu ne'ebé haktuir iha akuzasaun ministériu públiku nian. Entretantu, lezada deklara katak arguidu duni mak baku nia hanesan faktus ne'ebé hakerek iha akuzasaun ministériu públiku.

Testemuña Natalia dos Santos nu'udar sira nia viziñu, depoimentu katak nia hare ho matan arguidu baku duni lezada hanesan haktuir iha akuzasaun ministériu públiku.

Bazeia ba faktu hirak ne'e, iha alegasaun finál, ministériu públiku husu ba tribunál atu kondena arguidu tuir artigu 145 Kódigu Penál. Entretantu, defeza husu ba tribunál atu aplika pena ne'ebe justu no adekudu ba arguidu.

Depois rona tiha alegasaun finál hosi parte rua, tribunál konklui kedas prosesu ne'e no kondena arguidu ho pena prizaun tinan 1 suspende ba tinan 2.

10. Kazu krime kondusaun sem karta no ofensa ba integridade fízika negligente - Nú. Prosesu : 195/pen/2014/TDS

Kompozisaun Tribunál	: Singulár
Juis	: Dr. Costancio Barros Bâsmery
Ministériu Públiku	: Dr. Mateus Nessi
Defeza	: Dr. Manuel Amaral
Konkluzau	: Kondena ho pena multa US\$135

Iha 11 Fevereiru 2015, Tribunál Distritál Suai hala'o prosesu julgamentu ba kazu krime kondusaun sem karta no ofensa ba integridade fízika negligente ne'ebé involve arguidu Inacio Vicente hasoru lezadu Zeferino. Kazu ne'e akontese iha 09 Outubru 2013, iha Atabae, Distritu Bobobnaro.

Ministériu Públiku akuza katak iha 09 Outubru 2013, iha maizumenus tuku 07:00 dader, arguidu ho motor no soke lezadu ne'ebé hamrik hela iha estrada ninin. Aktu ne'e rezulta lezadu sofre kanek iha ain fuan no liman no arguidu kondus motor sem karta kondusaun.

Ministériu Públiku akuza arguidu kontra artigu 207 Kódigu Penál kondusaun sem karta ne'ebé nia moldura penal to'o tinan 2 ka multa.

Relasiona ho kazu arguidu soke lezadu, parte rua dame malu ona, nune'e lezadu deziste tiha kazu ne'e no kontinua prosesu deit ho krime kondusaun sem karta.

Iha prosesu julgamentu arguidu konfesa totalmente ba faktus hosi akuzasaun ministériu públiku relasiona ho krime kondusaun sem karta.

Iha alegasaun finál, ministériu públiku husu ba tribunál atu aplika pena prizaun tinan 1 suspende ba tinan 2. Entretantu, defeza husu ba tribunál atu aplika pena ne'ebé kmaan ba arguidu tanba arguidu konfesa ba faktus ne'ebé akuza hasoru nia.

Depois rona tiha alegasaun finál, tribunal konklui kedas kazu ne'e no kondena arguidu ho pena multa US\$135,00 ne'ebé kada loron sei selu US\$1,50 durante loron 90. Tribunál kondena mós pena alternativa loron 40 iha prizaun kuandu arguidu la selu pena multa refere.

11. Kazu krime ofensa ba integridade fízika simples - Nú. Prosesu : 234/pen/2014/TDS

Kompozisaun Tribunál	: Singulár
Juis	: Dr. Costâncio Barros Bâsmery
Ministériu Públiku	: Dr. Mateus Nesi
Defeza	: Dr. Vasco Kehi (pesoa idonia)
Konkluzau	: Omologa

Iha 11 Feveiru 2014, Tribunál Distritál Suai Suai prezide julgamentu tentativa konsiliaun ba kazu krime ofensa ba integridade fizika simples ne'ebé involve arguidu Thomas Corte-Real no Valente do Carmo hasoru lezadu Marcal Lopez. Kazu ne'e akontese iha 2014 iha Surukraik, Distritu Ainaro.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Liuhosi julgamentu tentativa konsiliaun ne'e, arguidu sira rekoñese sira-nia sala no husu diskulpa ba lezada no promete katak nia sei la repeta tan krime ne'e iha futuru. Lezada mós fo perdua ba arguidu sira no deside dada fila fali kazu ne'e.

Bazeia ba pedidu dezistensia ne'e, tribunál omologa prosesu ne'e no absolve arguidu sira hosi akuzasaun ministériu públiku.

12. Kazu krime ofensa ba integridade fízika simples - Nú. Prosesu : 224/pen/2014/TDS

Kompozisaun Tribunál	: Singulár
Juis	: Dr. Alvaro Maria Freitas
Ministériu Públiku	: Dr. Jose Elo
Defeza	: Dr. Manuel Amaral
Konkluzau	: Omologa

Iha 17 Fevereiru 2014, Tribunál Distritál Suai prezide julgamentu tentativa konsiliaun ba kazu krime ofensa ba integridade fízika simples ne'ebé involve arguidu Lamberto do Nascimento no Flavio Ximenes hasoru Juvito Julio Cardoso. Kazu ne'e akontese iha 06 Abril 2014, iha Salele, Distritu Suai.

Ministériu Públiku akuza arguidu sira kontra artigu 145 Kódigu Penál kona-ba krime ofensa ba integridade fízika simples.

Iha prosesu ne'e, arguidu sira rekoñese sira-nia sala no husu diskulpa ba lezadu no promete katak nia sei la repeta tan krime ne'e iha futuru. Lezadu mós fo perdua ba arguidu sira no decide dada fila fali kazu ne'e.

Bazeia ba pedidu dezistensia hosi lezadu, tribunál omologa prosesu ne'e no absolve arguidu na'in rua hosi akuzasaun ministériu públiku.

13. Kazu krime omisídiu simples - Nú. Prosesu : 226/pen/2014/TDS

Kompozisaun Tribunál	: Koletivu
Juis	: Dr. Constancio B. Bâsmery, Dr. Argentino Luisa Nunes no Dr. Euzebio Xavier Vitor (estajiáriu)
Ministériu Públiku	: Dr. Jose Elo
Defeza	: Dr. Manuel Amaral
Konkluzau	: Kondena arguidu AC ho pena prizaun tinan 10 no absolve arguidu CA ho JG

Iha 18 Fevereiru 2015, Tribunál Distritál Suai hala'o prosesu julgamentu ba kazu krime omisídiu simples ne'ebé komete hosi arguidu AC, CA, JG hasoru matebian Ricardo Soares. Kazu ne'e akontese iha 19 Maiu 2014, iha Distritu Maliana.

Ministériu Públiku akuza katak iha 19 Maiu 2014, lezadu ho nia kolega nain rua fila hosi misa. Iha dalan klaran hasoru malu ho arguidu na'in tolu. Arguidu AC haruka lezadu para no husu ba lezadu katak "*imi mak tuda ami ka?*". Lezadu hatan ba arguidu katak nia la tuda. Maske nune'e, arguidu AC tuku kedas dala ida iha lezadu nia hirus matan. Lezadu mós responde atake ne'e no tebe dala ida iha arguidu nia kabun. Derepentí arguidu hasai tudik ida no sona iha lezadu nia kelen hun sorin loos nian no borus ba too iha arguidu nia orgaun seksuál.

Aktu rezulta lezadu monu kedas iha fatin akontesimentu no sofre kanek no ran sai barak. Maske atu lori lezadu ba tratamentu iha ospital maibé lezadu hakotu nia iis iha dalan klaran antes to'o ba iha ospital referal Maliana.

Ministériu Públiku akuza arguidu kontra artigu 138 Kódigu Penál kona-ba omisídiu simples ne'ebe nia moldura penal hosi tinan 8 to'o tinan 20 prizaun.

Iha prosesu produsaun ba provas, arguidu AC konfesa katak nia mak sona lezadu tanba odiu lezadu ne'ebé iha tempu sira sei eskola, lezadu sempre baku nia nune'e arguidu deside sai eskola tanba ne'e arguidu odiu lezadu to'o oho mate lezadu.

Entretantu, ba arguidu nain rua seluk; CA no JG deklara katak sira la baku no la halo asaun ruma hasoru lezadu.

Testemuña Armindo Godinho no Albino Pereira depoimentus katak sira hare ho matan arguidu AC mak sona duni lezadu.

Iha alegasaun finál, ministériu públiku husu ba tribunál atu altera artigu 138 kona-ba omísidiu simples ba iha artigu 139 kona-ba omísidiu agravadu. Ministeriu Públiku prezumi katak arguidu antes ne'e planea ona atu oho arguidu. Tanba ne'e, ministériu públiku husu ba tribunál atu kondena arguidu AC ho pena prizaun tinan 17 no kondena arguidu CA ho JG ho pena prizaun tinan 10.

Entretantu, defeza husu ba tribunál atu absolve arguidu CA ho JG hosi prosesu ne'e tanba arguidu na'in rua ne'e la involve. Enkuantu ba arguidu AC, defeza husu ba tribunál atu nafatin akuzar tuir artigu 138 Kódigu Penál kona-ba omísidiu simples.

Iha 27 Feveireiru 2015, konklui prosesu kazu ne'e no kondena arguidu AC ho pena prizaun tinan 10 tanba provadu komete krime omísidiu hasoru lezadu. Entretantu ba arguidu CA no JG, tribunál absolve tanba arguidu na'in rua la prova involve iha krime ne'e. Tribunal konsidera katak arguidu kontra artigu 138 Kódigu Penál kona-ba omísidiu simples bazeia ba akuzasaun inisial hosi ministeriu publiku.

14. Kazu krime abuza seksuál ba menór - Nú. Prosesu : 189/pen/2014/TDS

Kompozisaun Tribunál	: Koletivu
Juis	: Dr. Costáncio Barros Bâsmery, Dr. Alvaro Maria Freitas no Dr. Argentino Luisa Nunes
Ministériu Públiku	: Dr. Jose Elo
Defeza	: Dr. Joao Henrique de Carvalho
Konkluzau	: Adia

Iha 18 Feveireiru 2015, Tribunál Distritál Suai adia prosesu julgamentu ba kazu abuza seksuál ba menór ne'ebé diskunfia involve arguidu RL hasoru AdS. Kazu ne'e akontese iha 29 Maiu 2010, iha Distritu Same.

Prosesu julgamentu ne'e adia tanba arguidu la marka prezensa iha tribunál maske hetan ona karta notifikasaun hosi tribunál. Tanba ne'e, tribunál adia fali prosesu julgamentu ba iha 29 Abril 2015, tuku 02:30 lorokraik.

15. Kazu krime ofensa ba integridade fízika grave - Nú. Prosesu : 178/pen/2012/TDS

Kompozisaun Tribunál : Koletivu
Juis : Dr. Costáncio Barros Bâsmery, Dr. Benjamin Barros
(estajiáriu) no Dr. Argentino Luisa Nunes
Ministériu Públiku : Dr. Mateus Nessi
Defeza : Dr. Joao Henrique de Carvalho
Konkluzau : Sei Kontinua Prosesu

Iha 18 Feveiru 2015, Tribunál Distritál Suai julga arguidu LdCN ne'ebé akuza involve iha krime ofensa ba integridade fízika grave hasoru AS. Kazu ne'e akontese iha 20 Marsu 2014, iha Fatumea, Distritu Suai.

Ministériu Públiku akuza katak iha 20 Marsu 2014, lezadu fila hosi to'os atu ba uma. Wainhira to'o iha dalan klaran nia hare arguidu hamrik hela iha du'ut laran no hana nia ho rama besi ida kona iha lezadu nia kidan. Aktu ne'e rezulta lezadu sofre kanek no ran sai no tenke ba halo tratamentu iha ospítal durante loron ida.

Ministériu Públiku akuza arguidu kontra artigu 146 Kódigu Penál kona-ba ofensa ba integridade fízika grave.

Iha prosesu produsaun ba provas, arguidu nega faktus hosi akuzasaun ministériu publiku no deklar katak iha momentu ne'ebá nia iha hela uma.

Entretantu, lezadu kontinua mantein akuzasaun hosi ministériu públiku no deklar katak depois nia hetan hana, lezadu bolu no husu tuir kedas ba arguidu tanba sa mak arguidu hana nia. Maibé iha arguidu halai no ses an kedas hosi fatin akontesimentu.

Iha alegasaun finál, ministériu públiku husu ba tribunál atu halo alterasaun jurídika hosi artigu 146 Kódigu Penál kona-ba ofensa ba integridade fízika grave ba iha artigu 145 Kódigu Penál kona-ba ofensa ba integridade simples tanba krime ne'e la prenxe rekizitus iha artigu 146 Kódigu Penál refere.

Entretantu, defeza husu ba tribunál atu absolve arguidu hosi krime ne'e maibé karik tribunál iha hanoin seluk, defeza husu atu tribunál aplika pena ne'ebé justu no adekudu ba arguidu.

Depois rona tiha alegasaun finál, tribunál marka fali prosesu julgamentu ba iha 04 Marsu 2015, tuku 10:00 dader ho ajenda leitura akordaun.

16. Kazu krime aktu seksuál ho adolexente - Nú. Prosesu : 187/pen/2015/TDS

Kompozisaun Tribunál	: Singular
Juis	: Dr. Costáncio Barros Bâsmery
Ministériu Públiku	: Dr. Mateus Nessi
Defeza	: Dr. João Henrique de Carvalho
Konkluzau	: Sei kontinua prosesu

Iha 18 Feveiriu 2015, Tribunál Distritál Suai hala'o prosesu julgamentu ba kazu aktu seksuál ho adolexente ne'ebé involve arguidu LMK hasoru DMC ne'ebé sei ho idade 16. Kazu ne'e akontese iha 01 Maiu 2014, iha Distritu Suai.

Ministériu Públiku akuza katak iha 01 Maiu 2014, arguidu ba iha lezada nia uma no husu hahan atu han. Tanba ne'e lezada fo hahan bikan ida ba arguidu han. Depois han hotu lezada ba foti bee iha dapur laran atu fo ba arguidu maibé arguidu lao tuir lezada ba iha dapur laran no kaer lezada nia inus no buti lezada nia hirus matan no dehan ba lezada katak labele fo hatene ba lazada nia inan. Iha momentu ne'ebá lezada ho nia alin mesak iha uma maibé arguidu haruka tiha lezada nia alin ba hili aimaran.

Ministériu Públiku akuza arguidu kontra artigu 178 Kódigu Penál kona-ba aktu seksuál ho adolexente.

Iha prosesu julgamentu, arguidu rekoñese katak nia husu han duni no lezada fo duni han ba nia maibé nega faktus kona-ba kaer lezada nia-isin ne'ebé ministériu públiku akuza nia. Arguidu deklar katak nia la kaer lezada nia inus no la buti lezada nia hirus matan.

Entretantu lezada mantein faktus ne'ebé haktuir iha akuzasaun hosi ministériu públiku no deklar katak sekarik iha momentu ne'ebá nia la halai sai, arguidu bele estraga nia.

Bazeia faktu sira hirak ne'e, ministériu públiku husu ba tribunál atu aplika pena tuir artigu 178 Kódigu Penál kona-ba aktu seksuál ho adolexente. Entretantu, defeza husu ba tribunál atu aplika suspensaun ba pena prizaun ne'ebe kmaan no adekudu ba arguidu.

Depois rona tiha alegasaun finál, tribunál marka fali prosesu julgamentu ba iha 04 Marsu 2015 tuku 10:00 dader ho ajenda leitura akordaun.

17. Kazu krime abuza seksuál ba menór - Nú. Prosesu : 272/pen/2014/TDS

Kompozisaun Tribunál : Koletivu
Juis : Dr. Costáncio Barros Basmery, Dr. Euzebio Xavier Vitor
(estajiáriu) no Dr. Argentino Luisa Nunes
Ministériu Públiku : Dr. Jose Elo
Defeza : Dr. João Henrique de Carvalho
Konkluzau : Adia

Iha 19 Fevereiru 2015, Tribunál Distritál Suai adia prosesu julgamentu ba kazu abuza seksuál ba menór ne'ebé diskunfia involve arguidu BG hasoru DS. Kazu ne'e akontese iha 15 Abril 2014, iha Distritu Suai.

Prosesu julgamentu ne'e adia tanba arguidu la hatene nia loron moris nian. Tanba ne'e, tribunál adia prosesu julgamentu sein data fixa b julgamentu hodi hein arguidu nia sertidaun baptismu.

18. Kazu krime danu agravadu - Nú. Prosesu : 254/pen/2014/TDS

Kompozisaun Tribunál : Koletivu
Juis : Dr. Costáncio Barros Bâsmery, Dr. Benjamin Barros (estajiáriu)
no Dr. Argentino Luisa Nunes
Ministériu Públiku : Dr. Jose Elo
Defeza : Dr. Joao Henrique de Carvalho
Konkluzau : Sei kontinua prosesu

Iha 19 Fevereiru 2015, Tribunál Distritál Suai julga arguidu CRM, VdCM no JJB ne'ebé prátika krime danu agravadu hasoru Eskola Katolika Ave Maria – ESCAM Suai. Kazu ne'e akontese iha 19 Outubru 2013, iha Debos, Distritu Suai.

Ministériu Públiku akuza katak iha 19 Outubru 2013, arguidu sira ho kondisaun lanu, soe sigaru latun ba iha uma dut ida ne'ebé bain-bain estudante sira uja ba deskansa wainhira iha tempu rekereu. Aktu ne'e rezulta ahi han motuk tiha uma refere. Aktu ne'e hamosu prejuizu ba eskola hamutuk US\$1,000.00.

Ministériu Públiku akuza arguidu kontra artigu 259 Kódigu Penál kona-ba danu agravadu.

Iha prosesu produsaun ba provas, arguidu sira konfesa no rekoñese sira-nia sala no entrega ona osan US\$1,000.00 ba eskola hodi selu prejuizu ne'ebé mak eskola hetan.

Iha alegasaun finál, ministériu públiku husu ba tribunál atu aplika pena prizaun tinan 2 fulan 6 suspende ba tinan 3. Enkuantu, defeza husu ba tribunál atu aplika suspeensaun ba pena prizaun ne'ebé kmaan no adekudu ba arguidu sira.

Depois rona tiha alegasaun finál, tribunál marka fali prosesu julgamentu ba iha iha 04 Marsu 2015 tuku 10;00 dader ho ajenda leitura akordaun.

19. Kazu sivil obrigasaun poder paternal - Nú. Prosesu : 21/civil/2014/TDS

Kompozisaun Tribunál : Singulár
Juis : Dr. Costáncio Barros Bâsmery,
Ministériu Públiku : Dr. Jose Elo
Defeza : Dr. Manuel Amaral
Konkluzau : Remata/finál

Iha 20 Feveireiru 2014, Tribunál Distritál Suai hala'o prosesu julgamentu ba kazu poder paternal ne'ebé involve Rita da Sorecaon hanesan autora hasoru Lorenzo da Costa hanesan reu.

Iha prosesu ne'e, autora no reu konkorda atu sira nia oan na'in 4 ho tinan entre tinan 5 too 17 livre ba mai ka vizita inan-aman liu-liu iha loron ferias Natal, Paskua no ferias eskola nian. Reu iha direitu atu lori nia oan ba halimar iha nia uma maibé la bele obriga.

Aleinde ne'e, parte rua mós konkorda atu kada fulan reu fo alimentasaun ba sira nia oan US\$62,00 to'o labarik sira boot. Prosesu transferênsia ba osan ne'e, sei haruka liuhosi konta bankaria tuir loron ne'ebe parte sira konkorda ona.

Bazeia akordu ne'e, ministériu públiku no defeza konkorda no husu atu parte rua kumpri desizaun no provizaun sira iha akordu laran.

20. Kazu krime abuza poder - Nú. Prosesu : 148/pen/2014/TDS

Kompozisaun Tribunál : Koletivu
Juis : Dr. Argentino Luisa Nunes, Costáncio Barros Bâsmery
no Dr. Euzebio Xavier Vitor (estajiáriu)
Ministériu Públiku : Dr. Mateus Nessi no Dr. Antonio da Silva Tavarres
Defeza : Dr. Manuel Amaral, Dr. Oktaviano Cardoso (advogadu
privadu) no Dr. Afonso F. Gomes
Konkluzau : Sei kontinua prosesu

Iha 25-26 Feveireiru 2015, Tribunál Distritál Suai liuhosi tribunál movel iha Distritu Bobonaro julga kazu krime abuza poder ne'ebé involve arguidu DdSC, JdSF hasoru Ministériu Obras Públiku Distritu Bobonaro. Kazu ne'e akontese iha 2008, iha Distritu Bobonaro

Ministériu Públiku akuza katak iha tinan 2008, arguidu sira uja osan ratifikativu US\$ 300,212.00 ba projetu hadia estrada rural husi Suku Cova ba fronteira. Iha primeira faze arguidu sira uja

osan hamutuk US\$ 135,000.00 maibé projeitu ne'e la konsege finaliza no estrada kontinua ladiak. Tanba ne'e arguidu sira hasai tan osan US\$9,000.00 hodi ateru rai refere maibé nafatin la finaliza. Osan restu ne'ebé mak arguidu sira la uja fo fali ona ba estadu hamutuk US\$25,000.00.

Iha prosesu hadia estrada ne'e, arguidu haruka badaen sira servisu liu tempu ne'ebé hakerek ona iha kontratu. Badaen sira halo servisu iha loron sabadu, domingo no loron boot maibé selu la tuir loron ne'ebé sira servisu. Tanba ne'e badaen sira la satisfas no hato'o keixa.

Iha prosesu produsaun ba provas, arguidu sira deklarara katak sira selu osan bazeia ba lista naran ne'ebé mai hosi xefi suku. Arguidu sira kontinua deklarara katak projetu ne'e sira hetan bazeia ba autorizasaun hosi Primeiru Ministru.

Depois rona tiha deklarasaun hosi arguidu na'in rua, tribunál marka fali prosesu julgamentu ba iha 17 Marsu 2015, iha tuku 09:00 dader ho agenda rona depoimentus hosi testemuña ne'ebé la marka prezensa iha julgamentu ne'e.

21. Kazu krime violasaun seksuál agravadu - Nú. Prosesu: 228/pen/2014/TDS

Kompozisaun Tribunál	: Koletivu
Juis	: Dr. Argentino Luisa Nunes, Dr. Costâncio Barros Bâsmery no Dr. Euzebio Xavier Vitor (estajiáriu)
Ministériu Públiku	: Dr. Mateus Nessi no Dr. Antonio da Silva Tavarres
Defeza	: Dr. Manuel Amaral
Konkluzau	: Sei kontinua prosesu

Iha 25 Feveireiru 2015, Tribunál Distritál Suai liuhosi tribunál movel iha Distritu Bobonaro julga kazu krime violasaun seksuál agravadu ho natureza incestu ne'ebé involve arguidu AL hasoru MdFS nu'udar nia-oan rasik. Kazu ne'e akontese iha 06 no 07 Dezembru 2013, iha Distritu Bobonaro.

Ministériu Públiku akuza arguidu katak iha 06 Dezembru 2013, wainhira lezada toba hela arguidu tama ba iha lezada nia kuartu laran no kaer lezada nia ulun no halo lezada hakfodak no hader tiha. Iha momentu ne'ebá lezada husu ba arguidu arguidu katak "*apa atu foti saida?*" Maibe arguidu hatan katak "*laiha buat ida toba deit ba*". Depois arguidu mós sai fali hosi lezada nia kuartu laran. Wainhira lezada toba dukur tiha, arguidu tama fila fali ba lezada nia kuartu laran no halo violasaun seksuál ho lezada.

Tuir-mai iha 07 Dezembru 2013, iha tuku 04:00 madrugada, arguidu haruka nia feen (lezada nia inan) ba kuru tiha bee no arguidu aproveita tempu hodi tama ba lezada nia kuartu laran no halo tan violasaun seksuál ho lezada. Depois remata, arguidu ameasa lezada katak "*la bele dehan ba ó nia inan se lae ó mak mate ou hau mak mate*".

Ministériu Públiku akuza arguidu kontra artigu 172 Kódigu Penál kona-ba violasaun 173 Kódigu Penál kona-ba agravasaun.

Iha prosesu julgamentu arguidu nega faktu sira iha akuzasaun katak nia la ameasa lezada hodi halo relasaun seksuál maibé tanba hakarak ho hakarak.

Iha parte seluk, lezada mós deklara katak arguidu la ameasa nia wainhira halo relasaun seksuál. Lezada rekoñese katak nia la-halo asaun hasoru arguidu wainhira arguidu halo violasaun seksuál hasoru nia. Lezada deklara katak sira halo relasaun seksuál dala 2.

Iha alegasaun finál, ministériu Públiku husu ba tribunál atu kondena arguidu ho pena prizaun tinan 15. Entretantu parte defeza husu ba tribunál atu absolve ba arguidu hosi prosesu ne'e tomak tanba provas la sufsiente atu kondena arguidu.

Depois rona tiha alegasaun final, tribunál marka fali prosesu julgamentu ba iha 12 Marsu 2015, iha tuku 09:00 dader ho ajenda leitura akordaun.

22. Kazu krime ofensa ba integridade fízika simples - Nú. Prosesu : 242/pen/14.TDS

Kompozisaun tribunál	: Singulár
Juis	: Dr. Alvaro Maria Freitas
Ministériu Públiku	: Dr. José Elu
Defeza	: Dr. João Henrique de Carvalho
Konkluzau	: Omologa

Iha 25 Fevereiru 2015, Tribunál Distritál Suai liuhosi tribunál movel iha Distritu Bobonaro prezide julgamentu tentativa konsiliaun ba kazu krime ofensa ba integridade fízika simples ne'ebé involve arguidu AP hasoru lezadu sira hanesan: CR, JQ, SH, FG no LF. Kazu ne'e akontese iha Maliana Vila, Distritu Bobonaro.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Bazeia ba prosesu tentativa konsiliaun ne'e, arguidu rekoñese nia-sala no husu diskulpa ba lezadu sira no promete katak nia sei la repeta tan krime ne'e iha futuru. Lezadu sira mós fo perdua ba arguidu no decide dada fila fali kazu ne'e. Maibé antes perdua arguidu, lezadu sira husu ba tribunál atu fo xamada ba arguidu atu la repete tan ninia hahalok krime tantu ba sira no ema seluk.

Bazeia ba pedidu dezistensia ne'e, tribunál omologa prosesu ne'e no absolve arguidu hosi akuzasaun ministériu públiku.

23. Kazu krime ofensa ba integridade fízika simples - Nú. Prosesu : 167/pen/14.TDS

Kompozisaun tribunál : Singulár
Juis : Dr. Alvaro Maria Freitas
Ministériu Públiku : Dr. José Elu
Defeza : Dr. João Henrique de Carvalho
Konkluzau : Omologa

Iha 25 Feveiru 2015, Tribunál Distritál Suai liuhosi tribunál movel iha Distritu Bobonaro prezide julgamentu tentativa konsiliaun ba kazu krime ofensa ba integridade fízika simples ne'ebé involve arguidu JC, AdS no DdJ hasoru FJ. Kazu ne'e akontese iha Maliana Vila, Distritu Bobonaro.

Ministériu Públiku akuza arguidu sira kontra artigu 145 Kódigu Penál kona-ba krime ofensa ba integridade fízika simples.

Bazeia ba prosesu tentativa konsiliaun ne'e, arguidu rekoñese nia-sala no husu diskulpa ba lezadu no promete katak nia sei la repeta tan krime ne'e iha futuru. Lezadu mós fo perdua ba arguidu sira no decide dada fila fali kazu ne'e. Maske nune'e lezadu husu ba tribunál atu fo xamada ba arguidu sira atu la repete tan ninia hahalok krime tantu ba sira no ema seluk.

Bazeia ba pedidu dezistensia lezadu, tribunál omologa prosesu ne'e no absolve arguidu sira hosi akuzasaun ministériu públiku.

24. Kazu krime ameasa - Nú. Prosesu : 173/pen/14.TDS

Kompozisaun tribunál : Singulár
Juis : Dr. Constaçio Barros Bâsmery
Ministériu Públiku : Dr. Mateus Nesi
Defeza : Dr. Manuel Amaral
Konkluzau : Adia

Iha 25 Feveiru 2015, Tribunál Distritál Suai liuhosi tribunál movel iha Distritu Bobonaro adia prosesu julgamentu ba kazu krime ameasa ne'ebé diskunfia involve arguidu CS hasoru lezadu SB. Kazu ne'e akontese iha Maliana Vila, Distritu Bobonaro.

Tribunál adia prosesu julgamentu tanba lezadu no arguidu la marka prezensa mesmu hetan notifikasaun hosi tribunál. Tanba ne'e tribunál decide adia fali prosesu julgamentu ba iha loron seluk maibé tribunál seidak fixa loron.

25. Kazu krime kondusaun sem karta - Nú. Prosesu : 225/pen/14.TDS(ZEFF)

Kompozisaun tribunál : Singulár
Juis : Dr. Constaçio Barros Bâsmery

Ministériu Públiku : Dr. Mateus Nesi
Defeza : Dr. Manuel Amaral
Konkluzau : Adia

Iha 25 Feveiru 2015, Tribunál Distritál Suai liuhosi tribunál movel iha Distritu Bobonaro adia prosesu julgamentu ba kazu krime kondusaun seim karta ne'ebé involve arguidu AjdS. Kazu ne'e akontese iha Maliana Vila, Distritu Bobonaro.

Tribunál adia prosesu julgamentu tanba arguidu la marka prezensa mesmu hetan notifikasaun hosi tribunál. Tanba ne'e tribunál decide adia fali prosesu julgamentu ba iha loron seluk maibé tribunál seidauk fixa loron.

26. Kazu krime ofensa ba integridade fízika simples - Nú. Prosesu: 258/pen/14.TDS

Kompozisaun tribunál : Singulár
Juis : Dr. Alvaro Maria Freitas
Ministériu Públiku : Dr. José Elu
Defeza : Dr. João Henrique de Carvalho
Konkluzau : Kondena ho pena prizaun fulan 6 suspende ba tinan 1

ha 25 Feveiru 2015, Tribunál Distritál Suai liuhosi tribunál movel iha Distritu Bobonaro prezide julgamentu ba kazu krime ofensa ba integridade fízika simples ne'ebé involve arguidu DAM, JA, DA, EA no JA hasoru JB, AB no PB. Kazu ne'e akontese iha 07 Juñu 2014, iha Mape, Distritu Bobonaro.

Ministériu Públiku akuza katak iha 07 Juñu 2014, arguidu DAM tolok no tuku JB iha nia hirus-matan no tebe iha kabun. Tuir-mai ministériu públiku mós akuza arguidu JA, tuku lezadu PB iha nia hirus-matan no tebe mós PB nia penis too monu tuun ba rai, wainhira lezadu koko atu sorii arguidu sira ne'ebé tuku hela lezadu JB.

Aleinde ne'e, ministériu públiku mós akuza arguidu DA no EA tanba tebe lezadu AB nia kanotak no kabun too monu no xama tan iha lezadu iha nia isin loloon.

Ministériu Públiku akuza arguidu sira kontra artigu 145 kona-ba ofensa ba integridade fízika simples.

Iha prosesu julgamentu arguidu sira konfesa faktu sira ne'ebé ministeriu publiku akuza hasoru sira. Maske nune'e arguidu sira deklarata katak sira komete aktu hirak ne'e tanba nervozu ho lezadu AB ne'ebé lakoi responsabiliza ba nia aktu seksuál hasoru arguidu sira nia feton.

Entretantu lezadu sira deklara katak momentu ne'ebá sira hakarak ba iha Mape, Bobonaro atu resolve kazu ne'e tuir mekanismu familia. Maibé wainhira sira mosu ba arguidu sira hasai liafuan tolok no hakilar sira.

Lezadu JB koko hakalma situasaun no husu atu rezolve tuir familia de'it, maibé arguidu DAM nervozu no tuku JB nia hirus-matan no tebe kona iha lezadu nia kabun. Tanba ne'e lezadu PB koko atu sori maibé arguidu JA tuku PB nia hirus matan no tebe iha nia penis too monu tuun ba rai.

Lezadu AB mós konfirma katak nia hetan baku hosi arguidu DA no EA iha nia kanotak no kabun too monu tuun ba rai no arguidu nain rua kontinua xama nia isin loloon ba iha rai. Iha kazu ne'e lezadu sira mós entrega karta atestadu médiku ba tribunál atu halo analiza.

Tribunál konsidera karta atestadu mediku ne'e, hato'o pedidu ba Ospital Referral Maliana hodi indika doutor espesialista ida hodi halo analiza ba karta refere. Doutor refere depoimenta katak lezadu sira provadu sofre moras no bubu iha parte kabun no kotuk maibé kona-ba sofrémentu iha penis la provadu.

Iha alegasaun finál, ministériu públiku husu ba tribunál atu aplika pena ne'ebé adekuadu ba arguidu tuir artigu 145 Kódigu Penál. Ministériu Públiku husu pena adekuadu ne'e ho intensaun atu eduka arguidu sira nune'e labele komete tan krime hasoru lezadu sira ka ema seluk iha futuro.

Entretantu, defeza husu tribunál atu aplika pena ne'ebé kmaan ba arguidu sira, no sei bele absolve arguidu sira tanba iha karta atestadu médiku la prova arguidu JA tebe lezadu PB nia penis. Defeza konsidera katak lezadu PB nia deklarasaun bosok no tenta atu hatodan pena ba arguidu JA ho arguidu sira seluk.

Depois rona tiha alegasaun final hosi ministériu públiku no defeza, tribunál konklui prosesu ne'e no kondena arguidu Domingos Asis Mello, João Asis, Duarte Asis, Elizio Asis no José Asis ho pena prizaun fulan 6 no suspende ba tinan 1 tanba provadu komete krime ofensa ba integridade fízika simples hasoru Justino Belo, Alberto Belo no Paulino Barros.

27. Kazu krime danu agravadu - Nú. Prosesu : 142/pen/2014/TDS

Kompozisaun Tribunál	: Koletivu
Juis	: Dr. Argentino Luisa Nunes, Dr. Costãncio Barros Bâsmery no Dr. Euzebio Xavier Vitor (estajiáriu)
Ministériu Públiku	: Dr. Jose Elo
Defeza	: Dr. João Henrique de Carvalho
Konkluzaan	: Absolve

Iha 26 Feveireiru 2015, Tribunál Distritál Suai liuhosi tribunál movel iha Distritu Bobonaro julga kazu krime danu agravadu ne'ebé involve arguidu JT, FTM, LdJM, EdS, AdS hasoru membru PNTL Distritu Maliana. Kazu ne'e akontese iha 01 Janeiru 2013, iha Saburai, Distritu Bobonaro.

Ministériu Públiku akuza katak iha 01 Janeiru 2013, iha tuku 06:00 arguidu sira hanesan membru PSHT tuda odamatan kareta polísia parte loos dala ida to'o kabetok tama. Aleinde ne'e arguidu sira mós tuda rahun ahi kareta parte kotuk nian. Aktu ne'e akontese wainhira polísia sira fila hosi patroliia iha Suku Saburai tanba diskunfia membru PSHT balun hala'o hela treinamentu. Maibé to'o iha ne'ebá laiha ema ida mak hala'o treinamentu PSHT nian.

Ministériu Públiku akuza arguidu sira kontra artigu 259 Kódigu Penál kona-ba danu agravadu.

Iha prosesu produsaun ba provas, arguidu sira rekoñese katak sira treinu duni maibé sira nega katak la tuda kareta no la hatene se mak tuda kareta refere.

Testemuña Inacio Amaral no Stefanus Bere Mau (PNTL ne'ebé hala'o patroliia) depoimenta katak sira no membru PNTL seluk ba iha fatin akontesimentu tanba hetan informasaun katak iha iha grupu balun (PSHT) hala'o hela treinamentu. Sira ba ho karete rua maibé la hare ho matan se mak tuda kareta iha akontesimentu ne'e no sira so rona deit hosi ema.

Iha alegasaun finál, ministériu Públiku husu ba tribunál atu fo justisa ne'ebe justu ba arguidu sira. Enkuantu, defeza husu ba tribunál atu absolve arguidu sira hosi prosesu tomak tanba arguidu sira la komete krime ne'e.

Iha loron tuir-mai, 27 Feveireiru 2015, tribunál konklui prosesu ne'e no absolve arguidu sira hosi akuzasaun ministériu públiku nian tanba la iha provas sufsiente atu kondena arguidu sira.

28. Kazu krime tentativa violasaun seksuál agravadu - Nú. Prosesu: 230/pen/2014/TDS

Kompozisaun Tribunál	: Koletivu
Juis	: Dr. Alvaro Maria Freitas, Dr. Argentino Luisa Nunes Bâsmery no Dr. Euzebio Xavier Vitor (estajiáriu)
Ministériu Públiku	: Dr. Jose Elo no Dr. Antonio da Silva Tavarres
Defeza	: Dr. João Henrique de Carvalho
Konkluzau	: Sei kontinua Prosesu

Iha 26 Feveireiru 2015, Tribunál Distritál Suai liuhosi tribunál movel iha Distritu Bobonaro julga kazu krime violasaun seksual agravadu ne'ebé involve arguidu RdC hasoru lezada AI .Kazu ne'e akontese iha 16 Agostu 2013, iha Distritu Suai.

Ministériu Públiku akuza katak iha 16 Agostu 2013, iha tuku 12:00 meudia, lezada hamutuk ho nia kolega hat (feto ida) fila hosi eskola atu ba uma no la'õ liuhosi dalan ne'ebé bain-bain sira liu. Iha momentu ne'eba, arguidu subar helik hela iha has hun ai-laran fuik no dok hosi comunidade sira nia uma. Arguidu kaer tudik, hatais metan-metan, taka oin metin no hatais botas hakfuik "suit-siut" ba lezada no nia kolega sira.

Lezada ho nia kolega sira mesak kiik-oan hotu deit, tanba ne'e sira sente tauk halai. Wainhira lezada sira halai, arguidu duni tuir lezada sira no konsege kaer toman lezada AI. Arguidu dada lezada nia fuk ba kotuk no lezada hakilar maibé arguidu taka metin niaibun. Depois arguidu dada-obriga lezada ba duut laran no hahu kaer lezada nia isin lolon. Maske nune'e, lezada ho esforsu tomak, tebe dala ida iha arguidu nia penis, nune'e arguidu monu kedas ba rai. Wainhira arguidu monu, lezada halai no fo hatene ba nia aman.

Ministériu Públiku akuza arguidu kontra artigu 172 Kódigu Penál kona-ba violasaun no 173 Kódigu Penál kona-ba agravasaun konjuga ho artigu 23 Kódigu Penál kona-ba tentativa.

Iha prosesu julgamentu, arguidu nega faktu sira iha akuzasaun no deklarata katak nia la halo relasaun seksuál ba lezada. Arguidu hatutan katak iha akonsimentu ne'e nia iha Suai Oetawa halo hela servisu iha fronteira.

Entretantu, lezada AI deklarata katak arguidu duni-tuir nia ho nia kolega sira no kaer-toman nia maibé la konsege halo violasaun seksuál hasoru nia. Iha momentu nia halai hases aan hosi arguidu no wainhira nia hateke ba kotuk, hare katak hena ne'ebé taka arguidu nia oin laiha ona nune'e lezada bele koñese arguidu.

Iha parte seluk, testemuña AM, JdC, JJ no JB ne'ebé arguidu duni sira hamutuk ho AI deklarata katak sira hare ho matan katak arguidu mak duni sira iha momentu ne'ebá no kaer lezada.

Testemuña RM nu'udar arguidu nia viziñu depoimentu katak nia la hare ho matan akontesimentu ne'e, maibé tuir nia iha momentu ne'ebá arguidu iha hela arguidu nia uma no tur hamos hela nia sepatu.

Aleinde krime ne'e, arguidu mós komete krime omisídiu simples no hetan ona desizaun ho pena prizaun tinan 12 iha 11 Feveireu 2015. Kazu omisídiu simples ne'e tribunál rejista ho número prosesu 218/pen/2014 ne'ebé JSMP deskreve mós iha sumariu kazu ida ne'e.

Depois rona tiha testemuña ne'e, tribunál marka fali prosesu julgamentu ba iha 19 Marsu 2015, tuku 10:00 dader ho agenda rona testemuña seluk hosi parte defeza.

29. Kazu krime ofensa ba integridade física simples - Nú. Prosesu : 170/pen/14.TDS

Kompozisaun Tribunál : Singulár
Juis : Dr. Alvaro Maria Freitas
Ministériu Públiku : Dr. José Elu

Defeza : Dr. João Henrique de Carvalho
Konkluzan : Kondena ho pena fulan 1 suspende ba tinan 1

Iha 26 Feveiru 2015, Tribunál Distritál Suai liuhosi tribunál movel kondena arguidu Venancio Loe Laca tanba provadu komete krime ofensa integridade fízika simples hasoru Mateus Leto Mau. Kazu ne'e akontese iha 07 Maiu 2014, iha Kailako, Distritu Bobonaro.

Ministériu Públiku akuza katak iha 07 Maiu 2014, arguidu tuku dala ida ba lezadu iha nia hirusmatan no buti lezadu nia *penis*. Hosi akontesimentu ne'e rezulta lezadu senti moras iha hirusmatan no penis.

Ministériu Públiku akuza arguidu kontra artigu 145 Kódigu Penal kona-ba ofensa ba integridade fízika simples.

Iha prosesu julgamentu, arguidu konfesa katak nia komete duni krime ne'e hasoru lezadu tanba nervozu ho atetudi lezadu ne'ebé lakohi dulas arguidu nia hare kulit no haruka arguidu nia oan lori fila fali haree ne'e ba uma no dehan katak ba dulas iha fatin seluk. Tanba ne'e, arguidu nervozu hodi ba diskuti malu ho lezadu no to'o ikus arguidu tuku lezadu.

Arguidu deklara ba tribunál katak nia hamutuk ho nia defeza halo ona tentativa konsiliaun ho lezadu iha 26 Feveiru 2015 antes hahu tama ba julgamentu. Arguidu deklara katak nia hakarak selu kompensasaun US\$100.00 ba lezadu maibé lezadu lakohi no nafatin mantein atu lori prosesu kazu ne'e ba oin.

Entretantu, lezadu deklara katak iha momentu ne'ebá nia la simu arguidu nia hare atu dulas iha nia makina tanba diskunfia arguidu nia hare sei matak no bokon no bele etsraga nia makina dulas haré.

Iha alegasaun finál, ministériu públiku husu ba tribunál atu aplika pena ne'ebé adekua ba arguidu. Iha parte seluk, defeza husu tribunál atu aplika pena ne'ebé kmaan ba arguidu tanba antes ne'e arguidu iha inisiativa atu diak malu ho lezadu inklui oferese osan US\$100,00,- ba lezadu maibé lezadu lakohi. Tanba ne'e husu tribunál atu tetu sirkunstánsia atenuantes hotu antes halo desizaun ba kazu ne'e.

Depois rona tiha alegasaun finál hosi ministériu públiku no defeza, tribunál konklui kedas prosesu kazu ne'e no kondena arguidu ho pena prizaun fulan 1 suspende ba tinan 1.

30. Kazu krime danu simples - Nú. Prosesu : 225/pen/14.TDS (ZEFF)

Kompozisaun Tribunál : Singulár
Juis : Dr. Argentino Luisa Nunes

Ministériu Públiku : Dr. Antonio Tavares
Defeza : Dr. Manuel Amaral
Konkluzau : Omologa

Iha 26 Feveiru 2015, Tribunál Distritál Suai liuhosi tribunál movel iha Distritu Bobonaro absolve arguidu VdJ, AL, JL no EdA hosi kazu danu simples kontra lezadu SMdC tanba sira halo ona akordu dame antes no konkorda atu deziste fali sira nia kazu hosi tribunál.

Antes tribunál omologa kazu ne'e, tribunál husu ba arguidu sira husu diskulpa ba lezadu iha tribunál nia oin no promete katak sira sei la halo tan krime no estraga lezadu nia sasan inklui ema seluk nian iha futuru.

31. Kazu krime ofensa ba integridade fízika simples - Nú. Prosesu : 34/pen/14.TDS

Kompozisaun tribunál : Singulár
Juis : Dr. Constaçio Barros Bâsmery
Ministériu Públiku : Dr. Mateus Nesi
Defeza : Dr. Manuel Amaral
Konkluzau : Omologa

Iha 26 Feveiru 2015, Tribunál Distritál Suai liuhosi tribunál movel iha Distritu Bobonaro omologa prosesu krime ofensa ba integridade fízika simples ne'ebé involve arguidu BB hasoru lezadu FPDA tanba sira halo ona akordu dame antes prosesu kazu ne'e iha tribunál.

Antes tribunál omologa kazu ne'e, tribunál husu ba arguidu husu diskulpa ba lezadu iha tribunál nia oin no promete sei lahalo tan krime hasoru lezadu no ema seluk iha futuru.

32. Kazu krime ofensa ba integridade fízika simples - Nú. Prosesu : 243/pen/2014/TDS

Kompozisaun Tribunál : Singular
Juis : Dr. Costâncio Barros Basmery
Ministériu Públiku : Dr. Mateus Nesi
Defeza : Dr. Vasco Kehi (pesoa idonia)
Konkluzau : Adia

Iha 27 Feveiru 2014, Tribunál Distritál Suai liuhosi tribunál movel iha Distritu Bobonaro adia prosesu julgamentu ba kazu krime ofensa ba integridade fízika simples ne'ebé involve arguidu GdCA hasoru CX no CdJ. Kazu ne'e akontese iha Odomau, Distritu Bobonaro.

Tribunal adia prosesu julgamentu ne'e tanba lezadu CX la marka prezensa iha julgamentu. Tanba impedimentu ne'e, tribunál adia fali prosesu julgamentu ba iha 27 Marsu tuku 10:00 dader.

33. Kazu sivil obrigasaun poder paternal – Nú. Prosesu: 18/civil/2014/TDS

Kompozisaun Tribunál : Singulár
Juis : Dr. Costáncio Barros Bâsmery
Ministériu Públiku : Dr. Jose Elo
Defeza : Dr. João Henrique de Carvalho
Konkluzau : Remata/finál

Iha 27 Feveireiru 2015, Tribunál Distritál Suai liuhosi tribunál movel iha Distritu Bobonaro julga kazu poder paternal ne'ebé involve Santana Barreto hanesan autora hasoru Silvino Saldanha da Cruz hanesan reu.

Iha prosesu ne'e parte rua konkorda atu sira nia oan livre ba mai ka vizita inan-aman liu-liu iha lora feriadu lora boot sira hanesan feriadu Natal, Paskua no feriadu eskola. Aleinde reu iha direitu atu lori nia oan ba halimar iha nia uma maibé la bele obriga.

Tuir-mai, parte rua konkorda atu reu sei fo alimentasaun ba sira nia oan US\$75,00 kada fulan to'o labarik bo'ot. Reu sei haruka osan liuhosi konta bankaria tuir lora ne'ebé parte konkorda ona.

Ministeriu Publiku no defeza konkorda ho akordu hosi parte rua no husu atu parte rua kumpri akordu ne'ebé sira halo ona iha tribunál nia oin.

34. Kazu krime pasajen moeda falsa - Nú. Prosesu : 94/pen/2013/TDS

Kompozisaun Tribunál : Koletivu
Juis : Dr. Costáncio Barros Bâsmery, Dr. Alvaro Maria Freitas no Dr. Argentino Luisa Nunes
Ministériu Públiku : Dr. Jose Elo
Defeza : Dr. João H. de Carvalho
Konkluzau : Sei kontinua prosesu

Iha 27 Feveireiru 2015, Tribunál Distritál Suai liuhosi tribunál movel iha Distritu Bobonaro hala'o rejulgamentu ba kazu krime pasajen moeda falsa ne'ebé komete hosi arguidu FM no JM hasoru AC, JMR no AJ. Kazu ne'e akontese iha 04 Julu 2011, iha Atabae, Distritu Bobonaro.

Kazu ne'e, julga ona iha 23 Outubru 2014 no sei iha prosesu nia laran maibé tanba rezulasaun Parlamentu Nasionál ne'ebé espulsa autór judisiáriu internasional sira no sira tenke fila ba sira nia rain, tanba tenki halo rejulgamentu.

Ministériu Públiku akuza katak iha 04 Jullu 2011, arguidu FM lori osan falsu US\$20,00 tahan lima ba sosa sasan iha JMR nia kios. Maibé tanba osan rahun laiha, JMR lori tutan osan ne'e ba sosa sigaru masu lima, karatindeng botil 2 iha AJ nia kios hodi hetan osan rahun. Alende arguidu FM, sosa beer ABC lata rua iha AC nia kios ho osan falsu US\$20,00.

Iha prosesu julgamenteu, arguidu sira konfesa totalmente ba faktus ne'ebe ministériu públiku akuza hasoru sira. Arguidu sira mós deklarara katak sira pruntu fo fali lezada sira nia osan.

Depois rona tiha deklarasaun hosi parte rua, tribunál marka fila fali prosesu julgamenteu ba iha 18 Marsu 2015, tuku 09:00 dader ho ajenda rona depoimentos hosi testemuña sira.

35. Kazu krime violasaun seksuál - Nú. Prosesu: 254/pen/2014/TDS

Kompozisaun Tribunál	: Koletivu
Juis	: Dr. Argentino Luisa Nunes, Dr. Euzebio Xavier Vitor (estajiáriu) no Dr. Alvaro M. Freitas
Ministériu Públiku	: Dr. Jose Elo no Dr. Antonio da Silva Tavarres
Defeza	: Dr. João Henrique de Carvalho
Konkluzau	: Adia

Iha 27 Fevereiru 2015, Tribunál Distritál Suai hala'o liuhosi tribunál movel iha Distritu Bobonaro adia prosesu julgamenteu ba kazu krime violasaun seksuál ne'ebé diskunfia komete hosi arguidu NG hasoru lezada JJ. Kazu ne'e akontese iha Distritu Bobonaro.

Tribunál adia prosesu julgamenteu tanba arguidu no lezada la marka sira nia prezensa iha tribunál. Tanba ne'e tribunál marka fali prosesu julgamenteu ba iha 14 Abril 2015, tuku 11:00 dader.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
telefone: 3323883/77295795